



Kuvendi i Komunës Klinë  
Komiteti për Politikë dhe Financa  
01Nr 06-5132 /23  
Klinë,dt: 15.02 /23

### PROCESVERBAL

Nga mbledhja e I-rë e rregullt e Komitetit për Politikë dhe Financa, mbajtur, më 13.01.2023, me fillim nga ora 09:00 në sallën e Kuvendit të Komunës.

Mbledhjen e hapi Kryesuesi, z. Fadil Gashi, i cili përshëndeti të gjithë anëtarët e Komitetit, OSB-në, drejtorët dhe të pranishmit, gjithashtu theksoi se është mbledhja e parë për këtë vit. **Fadil Gashi, Kryesues:** Te rendi i ditës unë i kam tre kërkesa të reja jashtë kësaj që e kemi në rend dite dhe po filloj me radhë:

1. Plani i Punës së Ekzekutivit të Komunës për vitin 2023;
2. Inicimi i Plotësim-Ndryshimit të Rregullores për menaxhimin e mbeturinave në komunën e Klinës;
3. Plani komunal për menaxhimin e mbeturinave 2023-2027.

Kryesuesi, prezantoi rendin e ditës:

1. Arsyetimi i mungesave;
2. Shqyrtimi dhe miratimi i procesverbalit të mbledhjes së kaluar;
3. Shqyrtimi i Raportit Financiar janar-dhjetor 2022 (ref.drejt.fin);
4. Shqyrtimi i procesverbalit nga takimi i dytë i kryetarit të komunës me qytetarë për vitin 2022;
5. Shqyrtimi i Planit të Punës së Prokurimit për vitin 2023;
6. Shqyrtimi i Planit të Punës së KKSB-së për vitin 2023;
7. Shqyrtimi i kërkesave të arritura për Komitetin për Politikë dhe Financa për muajin dhjetor 2022- janar 2023;
8. Të ndryshme.

**Fadil Gashi, Kryesues:** Po besoj se me material kemi pasur pak problem, se adresat zyrtare është mirë t'i funksionalizojnë, se kur po ka material shumë po kemi problem pastaj të kemi qasje në dokumentet që po jua dërgojmë, kjo është e para, e dyta është që unë kam fjalë të mira që unë po besoj se jemi afër furnizimit me llaptop, ndoshta edhe kjo na ndihmon pak. Unë po hap debat rreth rendit të ditës me këto tre kërkesat tjera që të shtohen në rend të ditës.

**Pasi nuk kishte ndonjë vërejtje apo sugjerim, me 5 vota PËR, u miratua rendi i ditës.**

### **Pika 1. Arsyetimi i mungesave.**

**Fadil Gashi, Kryesues:** Unë po konfirmoj se prej 7 anëtarëve të KPF-së, jemi 5 sepse nuk kemi pranuar konfirmim ende ndaj ministrisë dhe besoj se me 5 ne mund të vazhdojmë seancën e mbledhjes.

**Pasi nuk kishte ndonjë vërejtje apo sugjerim, me 5 vota PËR, u miratua rendi i ditës.**

### **Pika 2. Shqyrtimi dhe miratimi i procesverbalit nga mbledhja e kaluar.**

**Fadil Gashi, Kryesues:** A ka dikush diçka rreth procesverbalit nga seanca e kaluar?

**Pasi nuk kishte ndonjë vërejtje apo sugjerim, Kryesuesi hodhi në votim dhe me 5 vota PËR, u miratua procesverbali nga mbledhja e kaluar.**

### **Pika 3. Shqyrtimi i Raportit Financiar janar-dhjetor 2022 (ref.drejt.fin).**

**Fadil Gashi, Kryesues:** Ne e kemi drejtorin e Drejtorisë së Financave, Ekonomisë dhe Zhvillimit, ju kisha lutur që ta bëni një prezantim dhe pastaj e kishim debatuar.

**Enver Berisha, drejtor i DFEZH:** Faleminderit Kryesues, përshëndetje për të gjithë! Meqë është takimi i parë i Komitetit për Politikë dhe Financa për këtë vit, ju uroj gjithëve të keni shëndet, në punë angazhim, harmoni në familje dhe në punët tuaja të përditshme. Jo veç në këtë rast që unë dua ta them por është një situatë të cilën e kemi vlerësuar të gjithë, kisha thënë në nivel vendi, se viti që e lamë pas ka qenë sfidues për arsye se u përballëm në të kaluarën edhe me situata të tjera të zakonshme, siç ishte kovidi, mandej u përballëm me dy gjëra që faktikisht ne veç i kemi pasur, është fjala për vonesa në shpalljen dhe kryerjen e punëve për shkak të mungesës së OSHP-së deri vonë, dhe e dyta, rritja e çmimeve e cila e ka bërë të veten në Kosovë dhe në komunën tonë që realisht ka qenë bukur sfiduese me mbërrirje me i realizuar të gjitha



projektet të cilat ne i kemi pasur. Por duke i pasur krejt këto sfida parasysh edhe para vetes, është jashtëzakonisht domethënëse dhe meritore se komuna e Klinës është ndër komunat që ka mbërri ta realizojë buxhetin e saj mbi 90% dhe këtë shifër ka pak komuna në Kosovë që e kanë, kështu që, është e rëndësishme kjo për faktin se ne do të jemi pjesë e fitores edhe të grandit si rezultat i shpenzimit të mirë të buxhetit për vitin 2022.

Planifikimi i buxhetit për vitin 2022 ka qenë, dmth grandit qeveritar ka qenë 10,372,411.74 euro;

- Të hyrat vetanake kanë qenë 1,065,865.00 euro;
- Të hyrat e bartura kanë qenë 1,196,666.06 euro;
- Participimi i qytetarëve ka qenë 41,443.63 euro dhe
- Një donacion i vogël nga "Save The Children" që ka qenë 5,437.68 euro.

Krahasuar me periudhën 2021 dmth ka qenë 1.46% rritja për grandin qeveritar, kanë qenë në të hyrat vetanake 28.35% , dhe prej krejt kësaj ne kemi mbërri t'i shpenzojmë këto mjete në këtë formë, dmth te grandit qeveritar ose te total buxheti i 12,000,000,00 euro kanë mbetur të pashpenzuara 12,680,000,00 euro, kanë mbetur të pashpenzuara edhe 1.100.000.00 euro.

Domethënë 760.000.00 euro barten si pjesë e buxhetit tonë, dmth janë mjete që nuk na merren, ndërsa mjetet që na merren janë diku 365.000.00 euro që janë nga paga dhe mëditje për shkak të një planifikimi që ne e kemi bërë për shujta, por që realisht ajo nuk është realizuar në mungesë të vullnetit që Ministria e Financave dhe Thesarit nuk e lejuan, por që këto mjete ka rrezik që të merren. Mirëpo, sido që të jetë, në investime kapitale, në mallra dhe shërbime, në komunal, në të gjitha shpenzimet për të cilat komuna është përgjegjëse, në total jemi shpenzues të mirë të buxhetit në kuptimin e menaxhimit të projektit të kërkesave, kështu që, besoj se ky vit tash na krijon një mundësi që vërtet të kemi një situatë edhe më të mirë në periudhën vijuese, duke pasur parasysh pengesat që kanë qenë në vitin 2022 po shpresoj që nuk kemi me pas në vitin 2023 dhe komuna dhe qeveria lokale me qenë më efikase, me qenë më shpenzuese e buxhetit në kuptimin pozitiv, duke i realizuar të gjitha ato zotime që i ka bërë para qytetarëve dhe para votuesve. Kjo është sa për fillim, nëse ka dikush diçka që realisht është konkrete, ju e keni marr raportin e punës, besoj keni pasur mundësi edhe ta shihni por si zakonisht këto mbesin për t'i shqyrtuar edhe në subjektet tjera politike, me siguri që në fund me nxjerr një konkluzion për shpenzimet e këtij buxheti, faleminderit. Nëse ka kryesues diçka, unë do të mund të kyçem prapë.

**Fadil Gashi, Kryesues:** Faleminderit, drejtor, për prezantimin dhe raportin! Unë fillimisht, jo veç si kryesues, por edhe si anëtar i Kuvendit, kisha dashur që për seancë është mirë me na sjell edhe tabelat krahasuese, e kemi pasur si praktikë, te shpenzimet sidomos, sepse te të hyrat është një tabelë krahasuese që e krahason me vitin paraprak dhe vërtetojmë atë që e themi edhe në raport, se unë e di saktë se te drekat zyrtare, për vitin që e lamë pas janë shpenzuar 1.664.00 euro, unë e di se në vitin e kaluar kemi pasur edhe më shumë shpenzime sesa kjo. Kemi edhe 2-3 sqarime nëse ka mundësi për seancën jo për mua, i kemi nja dy vende, vendimet e pagesave për vendime gjyqësore, ne dy kategori i kemi, njërin e kemi te rrogat dhe pagat, që as sot nuk e kuptoj këtë term, me qenë paga edhe mëditje, por rroga dhe paga! Por kjo s'është faji ynë, është niveli i sistemit, e para është 24.073.00 euro dhe te kategoria e dytë, prapë janë shpenzime vendime gjykatës 30.600.074 euro, te mallra dhe shërbime, tash veç m'i krahasuar a janë të njëjta, se unë e di se te njëra pjesë duhet me qenë e arsimtarëve por kjo pjesa veç si krahasime, edhe një diçka që po shoh, se ka shumë shpenzime këtu, subvencionet për entitete jopublike 400.



628.00 euro në një pozitë që janë dhe në të dytin transfere kapitale për entitete jopublike, prapë janë 17.500.00. Veç këto 2-3 çështje i kishim marr për seancën.

**Enver Berisha, drejtor i DFEZH:** Realisht edhe paraprakisht, unë para se m'i rregulluar këto terme, unë i kam evituar të gjitha këto, por unë e pata parasysh që me siguri në seancë do të ngrihen. Për atë nuk i bëra sqarimet konkrete, por në krahasim sado që duken në emërtime të njëjta ose të ngjashme, kodet dallojnë, jo vetëm në këtë segment se ka plot ngjashmëri edhe me shpenzime tjera, që dmth si emërtim është i përafërt, por në buxhet dallon kodi, por për gjitha ato në seancë do të jetë e domosdoshme.

**Fadil Gashi, Kryesues:** Faleminderit, drejtor! Urdhëroni, nëse ka ndokush?

**-Komiteti për Politikë dhe Financa, pas shqyrtimit të Raportit Financiar janar-dhjetor 2022, me 5 vota për, asnjë kundër dhe asnjë abstenim, rekomandoi që për Kuvend të përgatitet tabela e shpenzimeve në krahasim me vitin paraprak, po ashtu rekomandoi që raportit të kalojë për shqyrtim në Kuvend.**

**4. Shqyrtimi i procesverbalit nga takimi i dytë i kryetarit të komunës me qytetarë për vitin 2022.**

**Fadil Gashi, Kryesues:** As këtë ende s'e kam kuptuar; pse duhet ne ta miratojmë këtë çështje ,as nuk marrim pjesë, as s'e dimë çka kanë folur, por e kemi formalisht, kështu si na është bërë. Kush është për?

**Komiteti Për Politikë dhe Financa, pas shqyrtimit të procesverbalit nga takimi me qytetarë i mbajtur nga kryetari i komunës z. Zenun Elezaj, me 5 vota për, asnjë kundër dhe asnjë abstenim, rekomandoi që procesverbali të kalojë për shqyrtim në Kuvend.**

**5. Shqyrtimi i Planit të Punës së Prokurimit për vitin 2023.**

**Fadil Gashi, Kryesues:** Ne kemi zyrtarin e prokurimit, z.Labinot Morina, nëse dëshironi ta bëni një prezantim, faleminderit! Besoj se ju e keni pranuar planin e prokurimit.

**Labinot Morina, zyrtar i prokurimit:** Përshëndetje për të gjithë! Sa i përket planifikimit të prokurimit për vitin 2023 është bërë në bazë të kërkesave nga njësitë kërkuese që kanë ardhur për këtë vit, për planifikimin e prokurimit për vitin 2023 që përbëhet nga gjithsej 97 procedura, të cilat për furnizime janë 20 procedura që kanë vlerën 1.016.000.00 euro, përbëhet prej shërbimeve 12 procedura që e kanë vlerën rreth 300.000.00 euro dhe rreth 97 procedura për punë që e kanë vlerën prej 3.800.000.00 euro, pra, planifikimi në bazë të njërive kërkuese është rreth



5.161.000.00 euro.

Pra, në buxhet nuk janë të planifikuara edhe disa procedura që janë të lidhura me kontrata 2 dhe 3 vjeçare, që nuk shihen këto në planifikim. Po ashtu, gjatë planifikimit të prokurimit që e keni ju, është një ndryshim në faqen 17 është vetëm instalimi i kaldajës në shkollën e Budisalcit, që është në vlerë diku 30.000.00 euro që mund të futet për rend ditës, ky është planifikimi për vitin 2023.

**Fadil Gashi, Kryesues:** Faleminderit, a ka dikush tjetër?

**Tunë Dedaj:** Po, Kryesues, përshëndetje për ju të gjithë! Unë e kam një kërkesë; që me kohë të bëhet çdo gjë e mos të lihet në fund. Zyra e prokurimit me i shpall tenderët e këto, por gjithmonë të bëhet në fillim të vitit edhe në këtë kohë të punohet sa më mirë edhe sa më kualitet, dhe nëse në ndërmarrje nuk i kryen punët me kohë, me vënë në listë të zezë.

Pra, gjitha këto me kohë me i bërë e jo me prit në fund ose me prit në shtator-tetor, kur është në përfundim të vitit e pastaj m'i kryer punët me nguti, kaq!

**Labinot Morina:** Po, Tunë, faleminderit, por sa i përket inicimit të procedurave zakonisht bëhet prej Drejtorive, ne nuk mund ta fillojmë një procedurë pa na ardhur kërkesa për inicim, kështu që, këtë adresim më mirë është Drejtorive, e sa i përket penalizimit, këtë vit janë bërë 7 ndërprerje të kontratave me penalizime, disa me pajtueshmëri të dyanshme me ndryshime të çmimeve të inflacionit, kështu që, as ajo nuk është për fajin e zyrës.

**Enver Berisha, drejtor i DFEZH:** Unë në fillim e thash, që ky vit ka pasur probleme me shpalljen e tenderëve për shkak se nuk ka funksionuar OSHP-ja disa muaj edhe komuna jo e Klinës po e gjithë Kosovës s'kanë mundur të shpallin projektet, pastaj kërkesat prej drejtorive, po edhe menaxhimi i krejt projekteve është i drejtorisë në aspektin teknik të shpalljes edhe përcjelljen e tenderit në marrje pune, tutje është menaxheri i kontratës dhe Drejtoria që duhet me përcjell, po unë jam më se i sigurt që në këtë vit është një risi sepse secila Drejtori duhet të planifikojë buxhetin me shpenzuar sipas tremujorshave dhe ajo pjesë që nuk shpenzohet, ajo rrezikohet të na merret në fund të vitit. Këtë vit unë besoj që ka me qenë vit më i kujdesshëm edhe për drejtoritë sepse ato para që i kanë të planifikuara në buxhet ata duhet të fillojnë shumë shpejt me procedura për t'i shpenzuar, sepse në fund nuk ka më ashtu, po unë mund të pajtohem veç me një qasje që ju e thatë, që edhe aspekti i mbikëqyrjes edhe i kualitetit, këtu kisha thënë që drejtorët, cilido, dhe menaxherët e kontratës të kenë kujdes që të paktën punët të kryhen me efikasitet dhe me kualitet të mirë.

**Fadil Gashi, Kryesues:** Për ne, drejtor, ne i kemi drejtoritë, i kemi njësitë shpenzuese që në të njëjtën kohë janë edhe njësitë kërkuese, po unë po besoj që edhe zyra e prokurimit edhe pjesa tjetër që janë të veshur me përgjegjësi, është mirë, ne po lutemi gjithë mos me na ndodh. Unë tash e jap një shembull të zyrës sonë; që 6-7 muaj e kemi pritur një top letër me na ardh, me na rregulluar një printer së pari, që s'punonte edhe veç te ne në Kosovë e di që jemi "sui generis" me ditë Prishtina sa metra letër na vyen neve, ne duhet me prit deri ta lëshojnë ata një top letër me na sjell, i kemi harxhuar zyra jonë duke ja dhanë zyrës së ofiqarisë atje, se s'kishin për t'i kryer palët. Nuk është faji i komunës, është faji i atyre që na përcaktojnë, merre me mend, jua



përcaktojnë sa letër keni me shpenzuar, kjo është absurditet i llojit të vet edhe unë po shoh që këto janë planifikuar të blihen disa letra por nuk duhet me mbet në mëshirën e një të papërgjegjshmi atje, një kompani që mundohet ta mbulojë krejt Kosovën edhe deri t'i vjen rendi për Klinë nëpër zyrat tona, nëpër njësitë tona ose Drejtoritë tona, është e papërgjegjshme dhe pjesa tjetër të planifikimet që ju bëhen Drejtorive është mirë më herët qysh thotë edhe Tuna, me filluar me i bërë kërkesat në zyre të prokurimit. Ne, tani kemi hyrë në këtë vit, këta me shkolla tona p.sh., e dinë që ka me ardh dimri, pse mos të fillojnë që tani, të përgatiten me drunj. Unë po marr shembull veç shkollat, por ka edhe njësi tjera që mund të kryhen shumë më herët, e keni parasysh me pas ankesa qysh bëhen vonesat pastaj, i nxjerrim telashe edhe zyrës së prokurimit, ne të gjithë nga pak jemi përgjegjës, por, me këtë ndryshimin që e propozoj edhe zyrtari Labi dhe e kemi pranuar, ne kemi shqyrtuar në seancë, unë edhe njëherë po kërkoj nëse keni edhe ju diçka tjetër, është procedurë që ne duhet ta shqyrtojmë këtë planifikim dhe ta procedojmë, ta miratojmë dhe pastaj në afate janë të shkoqitura, a ka dikush?

**Enver Berisha, drejtor i DFEZH:** Ne si ekzekutiv, kësaj here kemi vendosur që secila Drejtori veç e veç me e përgatitur Planin e punës dhe atë plan me unifikuar në kuadër të gjitha Drejtorive dhe me bërë në formë të broshurës dhe besoj shumë shpejt do ta keni edhe ju si asamblistë por edhe qytetarët, kushdo që është i interesuar ta ketë dhe me e parë se secila Drejtori çka ka planifikuar për vitin 2023. Unë besoj që kjo është një risi por është risi e mirë, të njëjtën formë ta bëjmë edhe raportin e punës, edhe ata do ta vëmë bashkërisht të gjitha Drejtoritë çka është kryer në vitin 2022 dhe në fund të broshurës atë raport me pas edhe ekzekutivi edhe qytetarët që kushdo që është i interesuar me ditur çka ka bërë komuna për 2022-tën dhe çka planifikon për 2023-tën, me pas në formë të broshurës.

**Fadil Gashi, Kryesues:** Faleminderit drejtor, ju po e shihni, ne e kemi Planin e punës edhe të ekzekutivit edhe anëtarët e Kuvendit në vazhdimësi në seancë mund t'i shikojnë a po implementohen planet apo s'po implementohen, a ka dikush tjetër?

**-Komiteti për Politikë dhe Financa, pas shqyrtimit të draft-planifikimit të prokurimit për vitin 2023, pa ndonjë vërejtje apo sugjerim, me 5 vota për, rekomandoi që draft-planifikimi të kalojë për shqyrtim dhe miratim në Kuvend.**

## **6. Shqyrtimi i Planit të Punës së KKS-së për vitin 2023.**

**Fadil Gashi, Kryesues:** Kush po na prezanton këtë? Është dashtë edhe nënkryetarja me qenë këtu, edhe ky plan është çështje e rregullt, është procedurë e rregullt, se ne për çdo vit e miratojmë Planin e Këshillit të Sigurisë në Bashkësi dhe ata e vazhdojnë punën e vet duke u bazuar edhe në planifikime edhe në takime edhe në aktivitete, ashtu qysh si i kanë paraparë. Pjesën dërrmuese ju veç po e shihni, këndejanë pa kosto buxhetore, nuk e ka ndonjë implikim, kështu që, me thënë përpos atyre që ne veç i kemi planifikuar në buxhet për një vit fiskal. A ka dikush për këtë plan, kush është për?



Komiteti për Politikë dhe Financa, pas shqyrtimit të draft-planit të KKSB-së për vitin 2023, me 5 vota për, asnjë kundër dhe asnjë abstenim, rekomandoi që të kalojë për shqyrtim dhe miratim në Kuvend.

## 7. Shqyrtimi i kërkesave të arritura për Komitetin për Politikë dhe Financa për muajin dhjetor 2022- janar 2023.

### Kërkesë 1.

Kërkesë për shfrytëzimin e parcelës P-71011030- 00116-0, Zona Kadastrale Drenoc, Klinë. Parashtrues i kërkesës, Gievdet Feiza Prebreza, thekson: Po e dorëzoj këtë kërkesë për marrje në shfrytëzim të parcelës me numër P-71011030-00116-0, zona kadastrale Drenoc, me sipërfaqe 3503 m<sup>2</sup> e cila gjendet para parcelës time me numër P-71011030-00117-3, parcelë në të cilën unë kam dy shtëpitë në të cilat banoj me familje. Parcela gjendet para parcelës time në komplet gjatësinë, andaj më duhet shfrytëzimi i saj për pastrim nga shkurret, mbjellje të drunjve dekorativ, hapësirë gjelbëruese. Shprehem i gatshëm që në rast të dhënies në shfrytëzim të kësaj parcele do të jem i gatshëm të paguaj taksat sipas ligjeve në fuqi dhe që ta kthej prapë kurdo që kërkohet. Po ashtu, zotohem në mirëmbajtjen në mosdëmtim të mjedisit brenda kësaj parcele.

**Fadil Gashi, Kryesues:** Ju e dini procedurën për dhënie në shfrytëzim të hapësirave publike, ne e kemi miratuar në seancën e fundit listën dhe për këtë vit tash kjo parcelë nuk është e planifikuar, tash këtu duhet me filluar me ju dhanë përgjigje palëve pak më ndryshe.

Vitin e kaluar, ne nuk kemi pasur listë të publikuar, tani për këtë vit e kemi listën e publikuar dhe për parcelat që nuk janë në listë ju e dini se ne nuk mund t'i fillojmë procedurat fare me i dhanë. Nuk e di a jam i qartë sepse e kemi tash një ndryshim për këtë vit, që kemi me u ballafaquar edhe me kërkesa tjera, tash për ato që nuk janë në listë, ne, nuk mund të fillojmë asnjë inicim, a ka dikush ? Si duket nuk ka, atëherë a po pajtoheni me këtë që unë e thash, se fillimisht parcela duhet me qenë në listë, ne edhe njëherë për siguri e marrim konfirmimin prej shërbimeve edhe gjeodetëve edhe atyre dhe kur t'i kthejmë përgjigjen palëve duhet me jua kompletuar me referenca të sakta. Kush është për ?

**-Komiteti për Politikë dhe Financa, me 5 vota për, asnjë kundër dhe asnjë abstenim, rekomandoi që kjo kërkesë të kalojë për shqyrtim në Zyrën e Kryetarit dhe në Drejtorinë për Kadastër, Gjeodezi dhe Pronësi, të trajtohet në bazë të Ligjit Nr.06./L-092 dhe Rregulloren (QRK) Nr. 09/2020 për përcaktimin e procedurave të dhënies në shfrytëzim dhe këmbim të pronës së paluajtshme të komunës.**

### Pika 8. Inicimi i plotësim-ndryshimit të Rregullores për menaxhimin e mbeturinave në komunën e Klinës.

**Fadil Gashi, Kryesues:** Ne e kemi një kërkesë realisht nga Drejtoria e Shërbimeve Publike, që



kërkon që të fillohet ndryshimi i rregullores për shkak të kostove, për shkak të ndryshimeve dhe të shpenzimeve dhe të arsyeve që ata i bëjnë. Ju e dini procedurën si bëhet plotësim-ndryshimi i rregullores, ne veç e kemi rregulloren që është miratuar në vitin 2017, rregulloren komunale për menaxhimin e mbeturinave në komunën e Klinës. Ne sot por edhe në seancën që vjen e marrim vendim veç për iniciimin edhe me lëshu në shqyrtim publik, edhe kjo është detyra jonë e parë, pastaj fillon shqyrtimi publik edhe tek në tjetrën seancë kur t'i kryejmë këto procedura ne shkojmë në miratim në seancë, por, pasi ne duhet me vendos për ndryshim për iniciim të plotësimi, unë po hap debat rreth kësaj, nëse ka dikush, urdhëroni?

**Tunë Dedaj:** Po, Kryesues, duke e marrë parasysh se janë rritur të gjitha, dmth janë rritur dhe derivatet e janë rritur të gjitha, edhe unë dhe grupi i AAK-së e mbështesim që të shqyrtohet mundësia që tu dilet në ndihmë, që të kenë ata mundësi m'i marr mbeturinat, se tash e dimë sa ka qenë 1 litër naftë, 1.00 euro dhe sot është 1.50 edhe në mënyrë automatike shpenzimet për t'i hequr mbeturinat nëpër shtëpia edhe më të mëdha dhe besoj që edhe qytetarët do ta presin me mirëkuptim një rritje sado e vogël që ju bëhet edhe le t'i del në ndihme kompanisë, për arsye që e keni vërejtur, pastrimi i qytetit dhe fshatrave për mua është i shkëlqyeshëm. Gjithmonë ka me ardh te unë kamioni, po flas për fshatin tim, të shtunën në ora 8:00 m'i marr mbeturinat në këtë fshat edhe besoj se është në gjitha fshatrat e komunës së Klinës kështu edhe në qytet dhe unë e arsyetoj këtë kërkesë të tyre, jam për ta shqyrtuar mundësinë për t'iu dal në ndihmë, për me ndryshuar rregulloren. Faleminderit shumë!

**Fadil Gashi, Kryesues:** Faleminderit, Tunë! Ne e kemi edhe një komision të cilin ne veç e kemi miratuar në këtë Kuvend, por unë po besoj që është edhe me shqyrtime edhe me raport të tyre, po besoj edhe këto që u thanë edhe ato që i kemi kërkesë në vazhdim, po ju them juve qysh e kanë pranuar edhe qysh kanë biseduar jo veç prej ekzekutivit tonë por edhe komunave tjera, të gjitha kanë hyrë në ndryshime sepse janë rritur kostot, ne jemi të vetëdijshëm a ka vend me i shikuar se pak ishin në rreth që po mujshim me pa çka mundemi me bërë. Pra, kjo kur të fillojë me fazë tjetër, kur të kalojmë në shqyrtim, sot po e fillojmë veç si iniciim, meqë e kemi rregulloren paraprake ne veç po bëjmë plotësim-ndryshim të rregullores në hapa të tjerë edhe në fund ne e përcjellim për të mundur këto ndërmarrje publike krejt me i kthyer te ne edhe mos me pas punë hiç me regjione as me të tjerët. Besoj që edhe dukshëm kishte me u përmirësuar edhe jo veç si ndërmarrje por edhe si funksion edhe si punë, a ka dikush, nëse s'ka, kush është për?

**-Komiteti për Politikë dhe Financa, me 5 vota për, asnjë kundër dhe asnjë abstenim, pas shqyrtimit të Draft- Rregullores Komunale për menaxhimin e mbeturinave në komunën e Klinës, rekomandoi që të kalojë për shqyrtim në Kuvend dhe të merret vendim për vënie në diskutim publik.**

#### **Pika 9. Plani komunal për menaxhimin e mbeturinave 2023-2027.**

**Fadil Gashi, Kryesues:** Ju tash veç e keni lidhshmërinë si e thash edhe unë që kjo lidhet me të



parën, është plan që votohet. Më ka bërë përshtypje te të hyrat, në Klinë inkasohen të hyrat e mbeturinave, në fakt 87.4% është shifër bukur e madhe, unë po flas gjithmonë duke ju referuar këtij raporti dhe që është për t'i përgëzuar gjithë qytetarët tanë sepse 87.4% është te amvisëritë dhe çka është më e keqja më shumë kanë dështuar në përqindje institucionet dhe bizneset sesa amvisëritë, është një përqindje që mua përnjëmend më ka lënë përshtypje të mirë në të hyrat që ka krijuar ndërmarrja.

Në faqen 24 unë po jua lexoj të hyrat dhe ofrimi i shërbimeve të menaxhimit të mbeturinave, të hyrat në amvisëri, shifra 88.3% , te bizneset 85% , te institucionet qenka 86% dhe prijnë amvisëritë që e kanë pagesën më të madhe që është për çdo inkurajim tjetër për këto biznese që nuk e lajnë, megjithëse për këtë ka edhe mekanizëm që mund t'i detyrojnë me bërë pagesa, urdhëro, Tunë?

**Tunë Dedaj:** Po, Kryesues, nuk është fort në pyetje mekanizmi por punëtorët janë shumë punëtorë që i mbledhin ato edhe qytetarët janë bindur që duhet të paguhet bartja e mbeturinave, janë bindur që kanë nevojë. Por unë e kisha kërkuar nga ju dhe nga kryetari i komunës, që të formohet një kompani komunale për bartjen e mbeturinave që nuk i marrin këta, p.sh., drunjtë, hekurat, këto të ngurtat, që nuk i marrin, me formuar një kompani komunale edhe m'i marr disa punëtorë, me ble një kamion ose me traktor edhe p.sh., një herë në muaj me shkuar bile nëpër fshatra, me qenë pikat e grumbullimit, e ato me marr e m'i dërguar në vende të destinuara. Kjo kishte me qenë edhe më e mirë se ato kanë mbetur pak, se nuk është diçka e hijshme p.sh., dikush krevatin e merr e gjuan dhe e len aty edhe kompania nuk ja merr se nuk ka si me e marr edhe kjo do të ishte mirë për komunën, për qytetarët, me formuar një këso lloj kompanie komunale, me gjet një mënyrë, kaq!

**Fadil Gashi, Kryesues:** Jo, mënyra është e gatshme, ne jemi tash në ndryshim të rregullores me paraparë nëse kemi mundësi ne, me bazë ligjore me paraparë për me marrë, a ka dikush tjetër?

**Tunë Dedaj:** Silvija Rashkoviç e ka një vërejtje se, afër Rudicës atje është një grumbullim i mbeturinave dhe kërkon që të shkojnë ta heqin, por nuk është e mundur me qenë 100% në çdo vend, po duhet me bërë përpjekje.

**Fadil Gashi, Kryesues:** Mirë, dikush tjetër? Nëse s'ka, kush është për ta rekomanduar për Kuvend?

**-Komiteti për Politikë dhe Financa, pas shqyrtimit të Draft-Planit Komunal për menaxhimin e mbeturinave 2023-2027, me 5 vota për, rekomandoi që të kalojë për shqyrtim në Kuvend dhe të merret vendim për vënie në diskutim publik.**

**Pika 10. Plani i punës së ekzekutivit të komunës së Klinës për vitin 2023.**

**Fadil Gashi, Kryesues:** Edhe këtë po besoj që e keni pranuar pak më me vonesë, por besoj që e keni dhe sot po e debatojmë. Unë po hap debat rreth kësaj, është një plan bukur i mirë, këtu i




kanë përshkruar përgjegjësitë që i kanë, përgjegjësitë veç i dimë, por çka kanë me bërë për këtë vit është dashur ta shkruajnë, plani këtë e ka, e jo çka ka përgjegjësi. Unë po hap debat rreth Planit të ekzekutivit, nëse ka dikush, urdhëroni?

-Pa ndonjë vërejtje apo sugjerim, Komiteti për Politikë dhe Financa, me 5 vota për, rekomandoi që Plani i Punës së Ekzekutivit për vitin 2023 të kalojë për shqyrtim dhe miratim në Kuvend.

Fadil Gashi, Kryesues: Me kaq po e përfundoj, faleminderit të gjithëve për pjesëmarrje dhe për angazhim!

Procesmbajtësja,  
Monika Palushi



KRYESUESI,  
Fadil Gashi

